

## Aðalfundur Dýraverndarsambands Íslands

Dags. 16. maí 2015, kl. 14:10.

Staður: Fundarsal Dýraverndarsambands Íslands, Grensásvegi 12A.

### Fundur settur, skipun fundarstjóra og fundarritara

Hallgerður Hauksdóttir, formaður Dýraverndarsambandsins (DÍS) setti fundinn og lagði til að Róbert Helgason tæki að sér fundarstjórn og Guðný Nielsen tæki að sér fundarritun. Fundurinn samþykkti það.

### Kynning framboða til stjórnar

Fundarstjóri fékk orðið og kynnti dagskrá fundarins. Framboð til stjórnar þurftu að berast skrifstofu DÍS fyrir 9. maí 2015. Tvö framboð bárust og voru kynnt á heimasíðu félagsins. Fundarstjóri tilkynnti að þau Liselotte Widing og Sigurður Steindór Pálsson væru sjálfkjörnir meðstjórnendur til tveggja ára. Benedikt Þór Axelsson var einnig sjálfkjörinn ritari þar eð hann gaf kost á sér til áframhaldandi starfa. Stjórn DÍS fyrir starfsárið 2015-16 er því svo skipuð:

Hallgerður Hauksdóttir formaður

Benedikt Axelsson ritari

Sif Traustadóttir gjaldkeri

Linda Karen Gunnarsdóttir meðstjórnandi

Liselotte Widing meðstjórnandi

S. Steindór Pálsson meðstjórnandi

### Ársskýrsla stjórnar

Formaður DÍS kynnti ársskýrslu stjórnar.

Formaður félagsins frá árunum 2007-2012 bað um orðið og sagði frá heimsókn DÍS á skrifstofu Dyrenes Beskyttelse í Danmörku árið 2010. Hann taldi mjög brýnt að “færi reglugerð um vistvæna landbúnaðarframleiðslu út” þá þyrfti DÍS að gera nýtt regluverk sem byggir á dýravelferð. Sú vinna og það regluverk myndi miða að því að bændur gætu sóst eftir vottun um velferð fyrir sínar afurðir. DÍS þyrfti því að geta gert úttekt á þeim bússkap. Þar sem þessar reglur yrðu ekki á vegum hins opinbera heldur gert af viðkomandi dýraverndarsamtökum væri eðlilegt að þeir bændur sem sækjast eftir þessari vottun myndu standa undir kostnaðinum. Hann taldi mikilvægt að sú úttekt og vottun stæði undir sér sjálf og lagði til að DÍS notaði til þessa sérstakt vottunarkerki.

Ársskýrslan var samþykkt með lófataki og verður hún birt á heimasíðu DÍS.

### Ársreikningar DÍS

Linda Karen Gunnarsdóttir, meðstjórnandi DÍS, kynnti og las ársreikninga sambandsins.

Stutt umræða fór fram um útistandandi kröfur, húsnæði félagsins, kostnað við Dýraverndarann og möguleika á auglýsingum í blaðinu og styrki vegna útgáfunnar.

Ársreikningarnir voru samþykktir einróma með handauppréttingu.

### **Lagabreytingar**

Engar lagabreytingar voru gerðar.

### **Félagsgjöld**

Stjórnin lagði til óbreytt félagsgjöld og samþykkti fundurinn það.

### **Nýir félagar bornir upp til samykktar**

Nýjir félagar voru bornir upp og samþykkti fundurinn þá og bauð velkomna með lófataki.

### **Önnur mál**

Tvær ályktanir lágu fyrir til samþykktar og voru þær birtar á vegg í fundarsal.

### **Ályktun vegna verkfalls dýralækna í matvælaeftirliti.**

Lögum samkvæmt bera dýralæknar og bændur meginábyrgð á að tryggja velferð búfjár og ríkisvaldinu ber að tryggja að lögunum sé fylgt.

Dýraverndarsamband Ísland tekur ekki afstöðu gagnvart málstað eða hagsmunum dýralækna, bænda né ríkisvaldsins við núverandi aðstæður, en telur að velferð og hagsmunir dýra séu að verða undir vegna þeirrar stöðu sem er uppi.

DÍS telur því nauðsynlegt að án nokkurra tafa verði fundin leið óháð þeim ágreiningi sem uppi er sem tryggir velferð búfjár. Ef ágreiningsaðilar geta ekki komist að slíku samkomulagi er það að lokum á ábyrgð ríkisvaldsins að framfylgja lögum 55/2013 um dýravernd, með hverjum þeim ráðum sem duga.

Ályktun Dýraverndarsambands Íslands er ákall til stjórnvalda um að taka til varna fyrir hönd dýra sem hér líða fyrir átök manna.

### **Ályktun vegna stefnu Öryrkjabandalags Íslands gagnvart gæludýrum í leiguhúsnæði samtakanna.**

Samkvæmt heimasíðu ÖBÍ er markmið samtakanna að vinna að samfélagslegu réttlæti og bættum lífsgæðum og kjörum óháð líkamlegu eða andlegu atgervi einstaklinga. Gildi ÖBÍ eru þátttaka, jafnræði og ábyrgð. Samkvæmt samningi Sameinuðu þjóðanna um réttindi fatlaðs fólks er í 19. grein viðurkenndur jafn réttur þeirra til að lifa í samfélaginu og til að eiga valkosti til jafns við aðra.

Í rannsókn sem unnin var af MMR í apríl 2015 kom fram að gæludýr eru á 4 af hverjum 10 heimilum landsmanna. Margsýnt hefur verið fram á bætandi áhrif gæludýra á andlega og líkamlega heilsu manna.

Aðalfundur Dýraverndarsambands Íslands skorar á ÖBÍ að finna leiðir til að leyfa gæludýrahald í húsum samtakanna með eðlilegum húsreglum og almennum viðmiðum, en ella fari ÖBÍ gegn markmiðum sínum og gildum.

Við teljum að ef fólk sem býr í fjölbýlishúsum á Íslandi getur almennt fundið leiðir til að lifa með gælundýrum nágranna sinna, hljóti ÖBÍ að miða einnig við það í sínu leiguhúsnæði.

Við minnum á að margir þeir sem búa í skjóli ÖBÍ eiga þess ekki kost að flytja sökum fötlunar sinnar og fyrir þetta fólk eru það afarkostir að geta ekki haft sín gælundýr.

Við skorum á ÖBÍ að standa vörð um sín gildi og færa húsreglur til nútímahátta.

Fundargestur spurði hvort DÍS hefði möguleika á að koma einstaklingum í ÖBÍ til aðstoðar varðandi rétt sinn til að halda selskapsdýr. Formaðurinn sagði DÍS hafa vakið máls á þessu í fjölmiðlum og tilbúið að beita sér áfram fyrir þessu vegna þess að þetta er hluti af því að gera þá kröfu til samfélagsins að það geri betur ráð fyrir selskapsdýrum. Félagið hefur ekki almennt bolmagn til að veita fé í slíka aðstoð, enda fremur um velferð manna að ræða.

Fundargestur velti upp þeirri spurningu hvort mögulegt væri að veita utanaðkomandi aðilum aðgang að aðalfundi, þó án kosningaréttar. Fundarstjóri nefndi að DÍS haldi af og til opna fundi og málþing. Formaðurinn sagði alla dýravini velkomna á þá fundi en að aðalfundurinn sé aðeins verið opinn félagsmönnum, líkt og venja er hjá félagasamtökum.

Báðar ályktanir voru samþykktar einhljóða.

Fundi slitið kl. 15:15.